



Il balon cuntune linie taiade cul curtis, un efiet che al ten ducj cui voi tacâts ae television: al zire, al curve, cuasi a si plee e al jentre dentri inte rêt da Gjermanie, dongje dal pâl. Un secont dopo, ator ator di Bepial ven fûr il fisco. La int a samee sbrocâsi di colp. E no dome di dute la soference dai 90 minûts e dai tims supplementârs, ma ancje di ducj chei altris problemis che le butin jù, come il mutuo da cjase a tas variabil. Di colp al è dut un saltâ, une vosarie, un bracecuel e casin a manete.

Ma lui no, Bepi no. Lui al stâ fer a li, dûr come un cocâl; al prove a cjalâ tai voi colôr celest che i stan dongje e al viôt nassi une lagrimute e alore al stâ ancjemò plui cidin e si fâs inmò plui dongje. E pûr a jerin almancul trê mês che al veve progjetât di lâ a viodi une partide de Italie a Lignan sul maxischermo, par fâ casin cul grop dal paîs, bevi e divertîsi. Cuant che al veve capît che e sarès stade nuie mancul che la semifinâl dal campionât dal mont, nol stave plui tes mudantis e cumò che al viodeve i siei amîs strafats e sudâts a saltâ e balâ, ju cjalave cu la superioritât di chel che al capis che lôr no, lôr a no podaran mai capî!

Ma al è un moment. Doi minûts a passin che nancje tu ti inacuarzis e Del Piero al bute dentri il secont gol. Al pararès impossibil che a si podi fâ plui casin di prime, ma e je cussì e aromai a son ducj che a corin vie saltant e berlant tant che çupets.

Ma lui no. Al samee incredibil, ma al stâ ancjemò plui fer, fis a cjalâ chei voi celescj che cumò a vain pardabon.

Par un moment i ven il cagot di no savê ce dî o ce fâ. Il todesc lui no lu à mai savût. In Inglês al è simpri lâf mâl, a dispjet di ce che i bruntulave sô mari par che al studiàs. Ma cun dute la fuarce che al pues vê un disperât al tache a meti une peraule daûr di chê altre, cence fermâsi: "Helga, vuud iu laik to go vuid me on te beachin tu the terrazzaa mare, niar thesii?" I voi celescj a si spalanchin di colp pe sorprese, a spietin un moment, come par tirâsi fûr dal dolôr de partide, e il so cjavut biont al tache a movisi planc su e jù.

Al jere un ... *ja!*

4 di lui dal 2006: La squadre talianee je in finâl dal campionât mondiâl di balon.

4 di lui dal 2006: Bepi di mondiâl al à fat la so prime taconade.

di Aldo Rossi

#6